

**Razvojna banka Federacije  
Bosne i Hercegovine  
v.d. Predsjednik Uprave**

Broj: 5814-III/24  
Sarajevo, 13.05.2024. godine

Na osnovu člana 64. stav (1) tačka b), člana 70. stav (1), (3) i (6) Zakona o javnim nabavkama ("Službeni glasnik BiH", br. 39/14 i 59/22), Zapisnika o pregledu i ocjeni konačne ponude broj 5650-XI/24 od 09.05.2024. godine i člana 20. Statuta Razvojne banke Federacije Bosne i Hercegovine (u daljem tekstu: Banka), u postupku javne nabavke usluga održavanja i tehničke podrške jezgru informacionog sistema Razvojne banke Federacije BiH, donosim

**ODLUKU**

**o izboru ponuđača za nabavku usluga održavanja i tehničke podrške jezgru  
informacionog sistema Razvojne banke Federacije BiH  
za period 01.1.- 31.12.2024. godine**

**Član 1.**

Prihvata se konačna ponuda ponuđača PING d.o.o. Sarajevo, Jukićeva 36, 71000 Sarajevo - broj ponude 59/2024 i ugovor za nabavku usluga održavanja i tehničke podrške jezgru informacionog sistema Razvojne banke Federacije BiH za period 01.01.-31.12.2024.godine, dodjeljuje se ponuđaču PING d.o.o. Sarajevo u postupku javne nabavke putem pregovaračkog postupka bez objave obavještenja o nabavci.

**Član 2.**

Ukupna cijena konačne ponude iznosi 124.392,00 KM, što u konačnici s uračunatim PDV-om iznosi 145.538,64 KM (slovima: stotinučetrestetpethiljadapetstotinatridesetosam KM i 64/100).

**Član 3.**

U skladu sa odredbama člana 70. stav (6) Zakona o javnim nabavkama, Ugovorni organ će objaviti ovu odluku na svojoj web stranici [www.rbfbih.ba](http://www.rbfbih.ba), istovremeno s upućivanjem iste ponuđaču koji je sudjelovao u ovom postupku.

**Član 4.**

Ova odluka stupa na snagu danom donošenja i dostavlja se ponuđaču koji je sudjelovao u postupku javne nabavke, saglasno članu 71. stav (2) Zakona o javnim nabavkama.

**Član 5.**

Za realizaciju ove odluke zadužuje se Sektor za podršku poslovanju.

## **OBRAZLOŽENJE**

Odlukom broj 2712-III/24 od 04.03.2024. godine pokrenut je postupak javne nabavke usluga održavanja i tehničke podrške jezgru informacionog sistema Banke, za period od 12 mjeseci (01.1.-31.12.2024. godine). Procijenjena vrijednost nabavke iznosi 125.000,00 KM bez PDV-a.

Shodno navedenom, a u skladu sa članom 28. stav (4) Zakona o javnim nabavkama (Službeni glasnik BiH 39/14 i 59/22), Razvojna banka Federacije BiH, na portalu javnih nabavki, objavila je informaciju o pregovaračkom postupku koji namjerava provoditi bez objave obavještenja o nabavci, i to sa ponuđačem PING d.o.o. Sarajevo, Jukićeva 36, Sarajevo.

Pregovarači postupak bez objave obavještenja o javnoj nabavci provodi se u skladu sa članom 21. stav (1) tačka c. Zakona o javnim nabavkama, odnosno usluga se može nabaviti isključivo od ponuđača PING d.o.o. Sarajevo koji je razvijao ABIS i vlasnik je izvornog koda (Source code) aplikacija.

Informacija o pregovaračkom postupku bez objave obavještenja o nabavci objavljena je na Portalu javnih nabavki dana 05.03.2024. godine, broj informacije: 1011-4-2-76-20-2/24. Tenderska dokumentacija objavljena je zajedno sa navedenom informacijom, te je 6 (šest) ponuđača preuzelo istu.

Ponuđač PING d.o.o. Sarajevo u utvrđenom roku dostavio je zahtjev za učešće sa kvalifikacionom dokumentacijom, nakon čega je Komisija imenovana Odlukom Ugovornog organa broj 2713-III/24 od 04.03.2024. godine sačinila Zapisnik o rezultatu pretkvalifikacije kandidata broj 3249-XI/24 od 14.03.2024.godine, te je na osnovu istog donesena Odluka o rezultatima pretkvalifikacije u pregovaračkom postupku javne nabavke bez objave obavještenja o nabavci broj 3441-III/24 od 18.03.2024. godine.

Odlukom o rezultatima pretkvalifikacije broj 3441-III/24 od 18.03.2024 godine konstatovano je da je ponuđač PING d.o.o. Sarajevo kvalifikovan za izvršenje usluga održavanja i tehničke podrške jezgru informacionog sistema u Razvojnoj banci Federacije BiH.

S tim u vezi, dana 25.03.2024. godine, na Portalu javnih nabavki objavljen je Poziv za dostavljanje početne ponude. Rok za podnošenje Početne ponude je bio 29.03.2024. godine do 14:00 sati.

Ponuđač PING d.o.o. Sarajevo dostavio je početnu ponudu dana 29.03.2024.godine u 09:55 sati. Nakon dostavljanja početne ponude u utvrđenom roku, Komisija za nabavke sačinila je Zapisnik o pregledu i ocjeni početne ponude broj 4018-XI/24 od 29.03.2024.godine, a ponuđaču PING d.o.o. Sarajevo, dana 04.04.2024.godine, dostavljen je poziv za pregovore.

Pregovori su održani 04.04.2024.godine u prostorijama Razvojne banke Federacije BiH u Sarajevu, a Zapisnikom o pregovorima broj 4285-XI/24 od 04.04.2024.godine konstatovano je da će cijena konačne ponude biti niža u odnosu na Početnu ponudu i iznositi će 124.992,00 KM bez PDV-a.

Slijedom naprijed navedenog, dana 29.04.2024.godine na Portalu javnih nabavki objavljen je Poziv za dostavljanje konačne ponude.

Rok za podnošenje konačne ponude bio je 08.05.2024. godine do 12:00 h, a ponuđač PING d.o.o. Sarajevo konačnu ponudu je dostavio dana 08.05.2024. godine u 10:00 h.

Komisija za nabavke izvršila je otvaranje, pregled i ocjenu konačne ponude, te je u svom Zapisniku broj 5650-XI/24 od 09.05.2024 godine konstatovala da je ponuda ponuđača PING d.o.o. Sarajevo prihvatljiva, sadrži sve podatke i dokumentaciju, u skladu sa zaključcima sa pregovora.

U postupku donošenja ove odluke posebno su cijenjene činjenice da je Komisija za nabavke pravilno i potpuno izvršila ocjenu kvalificiranosti ponuđača, te pregled i ocjenu ponude.

Uvažavajući sve prethodno navedeno, a prvenstveno činjenicu da je održavanje i tehnička podrška jezgru informacionog sistema Banke ključna usluga za kontinuiran i siguran rad informacionog sistema, pa i Banke u cjelini, kao i da je PING d.o.o. Sarajevo vlasnik izvornog koda (Source code) aplikacija, te ugovaranje održavanja ABIS aplikacija sa bilo kojim drugim pružaocem usluga, a bez otkupa izvornog koda, ne bi bilo moguće, te da je ponuda ponuđača prema kriteriju za izbor ponude (najniža cijena) ocijenjena prihvatljivom, odlučeno je kao u dispozitivu.

**Pouka o pravnom lijeku:**

Protiv ove Odluke može se izjaviti žalba najkasnije u roku od 10 (deset) dana od dana prijema Odluke saglasno članu 97. 99. i 101. Zakona o javnim nabavkama.



**v.d. Predsjednik Uprave**

**Borislav Trlin**

Dostaviti:

- Učesniku u postupku;